



Nua è l'umbli? Sura u sut?




FOTOS C. CADRUVI **Duas amias.**



**Pli pauc ch'ins vesa, pli interessant ch'igl è.**



**Donn ch'ins vesa betg l'umbli.**



**Questa dunna ha pli che tschuncanta onns. Quels gens stuess ins avair!**



**Tut en alv.**

# Venter, ventritgel, panza e bulscha

In pledoyer per mussar venter

DA CLAUDIA CADRUVI / ANR

In zic blut stoi esser. Là tranter la chautscha ed il t-shirt èsi da mussar pel. Quai na vala anc betg dapi blers onns. Avant diesch onns fissi stà in faux-pas total, sch'ins fiss marschè per las vias cun in t-shirt curt che lascha vesair il venter. Ma oz èsi quasi in dictat da la moda.

La primavaira sa nuspesch'ins forsia anc da mussar il venter alv. Ins pensa schizunt anc a la sanadad. Als gnirunchels sensibels che n'han betg gugent memia bler'aria. Ils gnirunchels chastian gea mintga dunna ch'expona els a l'aria currenta. Ma cura che las emnas passan viaden la stad, perd'ins las retegnientschas. Ils dubis pervi da la sanadad dostan ins cun las soccas da launa giufuns il truclet e raguda nauador las tailetas-filien destinadas per la stad: Ils tops, las chamischolinas e chamischuttas. Tailletas transparentas, traglischantas. Tailas sgiaglias e decentas, en nair provocant, en alv innocent u plain flurs. I n'emporta nagut en tge stil ch'ins sa vestgescha. Basta ch'ins vesa venter.

Betg mo las giuvnettas fan per cumond al trend. Anzi, era las pli avanzadas, pli passadas u ditg cun bels plets las dunnas pli madiras guardan ch'i manchia in zic taila tranter chautscha e t-shirt.

Ma l'emprim tar las giuvnettas. Ellas èn creschidas si cun questa moda, n'enconuschan nagut auter e portan magari sur onn blut. E gist tar las pli giuvnas dunnas è l'ur da la chautscha ruschnà ils ultims onns centimeter per centimeter plinengiu. Plaunsieu cuntanscha l'ur da la chautscha ina bassezza critica. Mintgatant, sch'ins vesa in ventritgel che porta la tschinta en tutta profunditad, han ins il sentiment ch'i stuess uss en sasez chuchegiar ora intgins pelegns. Ma fin al pail da la turp n'è la moda tuttina anc betg avanzada. Ella tegna onestamain distanza. Era sche questa onestadad dumbra be pli dus millimeters.

Ufan las giuvnettas d'ozendi forsia il medem cun ils chavels sut il venter sco cun la pelegna vi da las chommas e sut bratsch? Laschansa questas dumondas e speculaziuns. Giainsa cun ils patratgs puspè intgins cen-

timeters plinensi. Tar il venter sco tal.

Venters ves'ins propri da tuttas sorts. Ins po deplorar quai. Ins po vesair quai positiv. Las dunnas na sa laschan betg pli dicitar da stuair avair in venter plat, per sa lubir da mussar quel. Las mesiras che las revistas da dunnas prescrivan vegnan negligidas consequentamain. La finala vulan era las bulschettas e bulschas vesair la glisch dal di. Era il venter grasslut e grassottel dovra aria frestga. Ed era faudas han il dretg d'intgins radis da sulegl, per ch'ellas possian sa stender e (tgisa?) forsia svanir. E dal reminent: Sch'ins porta la panzetta cun ina tscherta luschezza e persvasiun, alura fa quella dapli effect ch'in lungurus venter plat.

Mussan betg er las dunnas sidamericanas gugent la ritgezza ch'ellas han enturn vita? E co statti cun las sautunzas orientalas? Na fan lur moviments betg dapli impressiun, sche la taglia ha si in zic charn.

Pia, allez hop! Ora cun ils venters! Per ch'i dettia ina chauda parada da stad. L'enviern è anc criv e lung avunda.



**Cun 45 onns dastgass la bulschetta schizunt esser pli grassa.**



**Perfetg cun piercing.**



**Bindels e maschas fan interessant.**



**Dus centimeters tranter rassa e t-shirt. Quai basta.**



**Umblis – quai fiss ina scienza per sasez.**



**Sco sche l'umbli cuchegiass ora per spir casualitad?**